

քարը ֆեոդալական Հայաստանի արվեստի լավագույն նմուշներից մեկն է (արձ. 155):

1217 թվականի մի արձանագրության մեջ կարդում ենք, որ Կյուրիկյան թագավորների երբեմնի մայրաքաղաք Լոռին ևս պատկանել է Սանահնի վանքին: Աշոտի որդի Գորգին իր որդիների հետ միասին Սանահնի վանքին է նվիրել Լոռին՝ յուր շահովն ու վնասովը և խոտհարքի տեղ, և փոխարենն ստացել է խաչգլուտի տունը:

Սանահնի նշանավոր վանահայրերից մեկն է եղել Աբասի որդի Գրիգորը: Նա ունեցել է բազմաթիվ ձեռագրեր: 1217 թվականի մի արձանագրությունից տեղեկանում ենք, որ Սանահնի վանքին է նվիրել 13 ձեռագիր գիրք (արձ. 33):

Այս Գրիգորը Սանահնում առաջին անգամ հիշատակվում է 1215 թվականի արձանագրության մեջ իբրև առաջնորդ, բայց 1219 թվականին նրա առաջնորդությունը Սանահնում ընդհատվում է: Նա այդ թվականին տեղափոխվում է Հառիճա վանք և այնտեղ վանահայր է դառնում: Այդ մասին տեղեկանում ենք 1219 թվականը կրող Հովհաննես գրչի ձեռքով գրված մի հիշատակարանից: Այնտեղ գրված է՝ «Յառաջնորդութիւն Գրիգորոյ վարդապետիս, որդոյ Աբասայ, որ եկն ի սուրբ ուխտէն Սանահնէն, առաջնորդ մաւրս լուսոյ և սպասաւոր»¹:

Գրիգորի առաջնորդությունը Հառիճա վանքում երկար չի տևում, նա նորից վերադառնում է Սանահն և այնտեղ մեռնում: Նրա գերեզմանը գտնվում է վանքի բակում և տապանաքարը թեև արձանագրված է, բայց թվական չունի:

Հառիճա վանքը գնալուց առաջ Գրիգորի անունով եղած վիմական արձանագրությունները պատկանում են 1215 (արձ. 155) և 1217 թվականներին (արձ. 33, և 49): Դրանից հետո վանքի արձանագրությունների մեջ իբրև առաջնորդ հանդես է գալիս Զաքարեի և Իվանեի քեռորդի Հովհաննեսը, որի արձանագրությունները վերաբերում են 1221-ից մինչև 1225 թվականներին (արձ. 56, 15, 174, 139), որից հետո՝ 1229 թվականից սկսած (արձ. 52, 58), նորից Գրիգորն է հանդես գալիս իբրև առաջնորդ՝

մինչև 1234 թվականը (արձ. 127):

Այս բոլորից եզրակացնում ենք, որ Գրիգորի վանահայրությունը Սանահնում տևել է 1215 թվականից մինչև երեսնական թվականները, 1219-ից մինչև 1225 թվականներին ընդմիջումով, երբ նա եղել է Հառիճա վանքում:

Աբասի որդի Գրիգորը հեղինակ է մի խիստ ուշագրավ աշխատության, որ «Պատճառ լայն և նուրբ գրեանց, առեալ ի հարցն սրբոց և ի վարդապետաց, և ի մի հաւաքեալ և հոգացեալ մեծ բաբունւպետին Գրիգորի, որդոյ Աբասայ» վերնագիրն ունի:

Այս գիրքն իրենից ներկայացնում է մի փորձ հին և նոր կտակարանների բոլոր գրքերի ծագման և նշանակության մասին համառոտ ծանոթությունների, որ կարող ենք այժմյան հասկացողությամբ ներածություն կոչել: Ծարադրության մեջ հեղինակը նախ իր գիտեցածն է շարադրում հին և նոր կտակարանի գրքերի մասին և ապա մեջ է բերում Հովհան Ոսկեբերանից ու Եփրեմ Ասորուց բազմաթիվ քաղվածքներ: Պատճառաց գրքի մեջ կան բացատրություններ նաև Փիլոն Թրակացու, Գրիգոր Աստվածաբանի, Բարսեղ Կեսարացու, Գրիգոր Նյուսացու, Դիոնիսիոս Արիսպագացու, Եւագրի, Դավիթ Անհաղթի, ինչպես նաև Դավիթ Քորայրեցու, Մխիթար Գոշի գրվածներից և կենսագրական տեղեկություններ նրանց մասին:

Աբասի որդի Գրիգորի այս աշխատության մասին 1895 թվականին լույս է տեսել մի հոդված «Արարատ» ամսագրում, որտեղ հոդվածագիր Կ. Վ.-ն նախ հատվածներ է տպագրել Պատճառաց գրքից և վերջում էլ ծանոթություն է տվել նրա բովանդակության մասին:

Նույն 1895 թվականին Հակոբոս վ. Տաշյանն իր «Յուցակ հայերէն ձեռագրաց մատենադարանին Մխիթարեանց ի Վիեննա» գրքի 213—233 էջերում, 47 համարի տակ, բերել է Պատճառաց գրքի իրենց մատենագրանում պահվող օրինակի նկարագրությունը և մանրամասն բովանդակությունը: Վիեննայի ձեռագիրը 19-րդ դարի արտագրություն է, որ վերցրած է 1725 թվականի մի ձեռագրից:

¹ Գ ա ռ ե գ ի ն արքեպ. Հ ո վ ս ե փ յ ա ն, Խաղբակյանք կամ Պոռչյանք հայոց պատմության մեջ, հատոր Ա, Վաղարշապատ, 1928, էջ 65: Ձեռագիր Մատենադարանի, № 1382: